

Sekatkan baung ekor merah di perairan

Ipoh: Jabatan Perikanan Negeri Perak memandangkan serius ancaman ikan asing mengganggu habitat spesies ikan asli di perairan umum seperti sungai dan tasik di negeri ini.

Pengarahnya Mohd Ghazali A Manap berkata usaha bagi menyekat dan mengurangkan kehadiran ikan asing khususnya baung ekor merah dan ikan tombot atau bandaraya sentiasa menjadi keutamaan jabatan itu.

Beliau berkata populasi baung ekor merah membiak dengan pantas dan menjadi ikan pemangsa yang mengganggu keseluruhan rantaian makanan, selain bersaing untuk ruang serta makanan dengan ikan spesies asli.

“Baung ekor merah atau nama saintifiknya *Hemibagrus wyckioides* dikesan memasuki perairan umum sejak Mac 2021 dan mengikut rekod, sebanyak 12.29 tan ikan itu

berjaya didaratkan oleh nelayan darat.

“Pada tahun ini setakat April lepas, lebih 2.01 tan spesies ikan terbabit telah berjaya direkodkan selain inventori juga menjumpai baung ekor merah ini telah sampai ke perairan Sungai Perak di Perak Tengah dan daerah berdekatan,” katanya.

Pada 29 Mac 2021, dianggarkan 250 sangkar sebuah syarikat penternakan ikan di Teluk Intan pecah akibat arus deras Sungai Perak, sekali gus menyebabkan beratus ribu ikan pelbagai jenis seperti tilapia merah, patin, baung dan jelawat putih serta 30 tan metrik ikan baung ekor merah terlepas ke perairan umum.

Mohd Ghazali berkata tiada lagi pengusaha ternakan baung ekor merah direkodkan jabatan itu di seluruh Perak sama ada secara haram mahupun yang memohon kebenaran menternak ikan itu.